

vne femme puiffante & en bon point deuant fa prife, elle parut pour lors fi defnuée de chair, fi hideufe, & fi foible, qu'elle estoit mefconnoiffable; elle demanda dès fon entrée fi le Pere qui inftruifoit les Sauvages n'estoit pas à Montreal, il estoit deuant fes yeux & elle n'y prenoit pas garde, le deffaut de nourriture luy auoit alteré le cerueau, on l'auoit prife pour vn vray squelette; comme elle n'auoit ny hache, ny coufteau, ny canot: mais feulemēt vn petit bout de ie ne ſçay quelle estoiffe toute vſée qui ne la couuroit qu'à demy, elle auoit souffert d'estranges tra-uaux, on luy donne à manger petit à petit, on la fait reposer, le lendemain ayant repris ses esprits, elle demande encore vne fois le Pere qui l'auoit instruite l'année precedente. Helas! disoit-elle, n'est-il point icy? il te parla si long-temps hier au soir luy dit l'Interprete, faites-le venir ie vous en prie, le Pere l'estant allé trouuer, elle luy dit mon Pere, hier ie n'auois point [38] d'esprit, ie ne me souuiens pas de t'auoir veu, instruis-moy ie te prie, i'ay attribué ma captiuité aux resistances que ie te fis l'an passé, lors que tu me voulois enseigner, ie n'ay pas laissé de prier Dieu, quoy que ie ne fusse pas baptisée, ie disois au profond de mon cœur c'en est fait, ie croiray, ie me feray instruire, ie prieray tout de bon, ie ne veux pas mentir, elle nous dit qu'il n'y auoit que deux iours qu'elle estoit accouchée quand elle se faua des Hiroquois, que son enfant qu'elle portoit dans son sein mourut bien tost apres, le laict luy manquant faute de nourriture. Elle adiouſtoit que les Hiroquois faisoient estat de venir en grand nôbre, notamment à Montreal: mais ils font, disoit-elle, affligez d'une maladie populaire qui en fait mourir